

Presumida

per Nieu Luzía Dueso Lascorz

Yera una mozeta rosa. Con el pel feto en trenas, que le deixaban la fren patalera de tot. Teneba es güellos pardos, cuasi doraus, grans y una miqueta abultaus, como si se le queresen escapá ta difuera. Yera a sabé que presumida. La suya mai, que'l sabeba, la cambeaba de bestiu cuasi toz es días.

Aquela maitinada, Quineta, que ye la mozeta de la que tos hablo, le baba un bestiu blanco con muitas pontillas. Y ella, que se trobaba mui rufa, cuan ba salí de l'ascuela de tardes, se'n ba dí ta casa de Pascualón, que yera la des suyos primos.

-¡Tía Francha!- ba llamó la mozeta dende la carrera- ya puyo ta la cocina- Y mientras el deziba, ba puyá en cuatro blincos al cabo l'escalera, ba ubrí la puerta de la cocina y ba saludá asinas:

- Güenas tardes y güen probeito- porque en casa Pascualón yeran brendando.

-Güenas las tiengas- le ban contestá es que yeran en la cocina.

- ¿Quiés brendá con nusatros?- ba preguntá su tío Manuel.

- No, ya he brendau dinantes.

-¿Quiés una zarpadeta de nuezes?- le ba preguntá su tía Francha.

- Güeno, ixo sí.- Y la mozeta ba alargá las mans ta su tía, que le'n ba deixá las dos rebotidas de nuezes.

Se ba asentá en un banco que i eba en la cocina, al canto la cadiera, al lau del suyo primo, que se llamaba Choseré. Cuan yera asentada le dizió: -¿En quiés?-Y le ba alargá la man, plena de nuezes, ta que se'n prenese las que queresen.

Choseré se'n ba redí, pero le ba contestá: -¡No'n quiero! Come-ne tú, que yo en como toz es días, ya soi farto de tanta nuez.

Cuan toz ban acabá de brendá, Quineta, que ya s'eba acabau las nuezes, se ba lebantá del banco, se ba pará en metá la cocina y, dando-se dos güeltas ta que toz la biesen bien cuan feba rodá el bestiu blanco que yera plen de pontillas, le ba dezí al suyo primo que se la miraba serio de tot:

-Choseré, ¿beis qué pontillas lebo? -Y se ba meté a rodá per la cocina, contenta de tot, porque se daba cuenta de que toz yeran mirando-se-la. Ixo de que se la mirasen le feba tanto goi que no podeba disimulá lo contenta que yera, de bier que toz teneban es güellos clabaus en ella. Choseré se la miraba cómo daba güelta y rodaba ta que las pontillas del bestiu se biesen bien. Cuan

le ba paixer que ya eba rodau prou, con a sabé la sorna, como quí se'n fa la mofla d'aquela mozeta tan presumida, Choseré le ba contestá serio de tot:

-Ta ixo yo tengo corderez y güellas, que tú no'n tiens- y ba callá. Perque ta él, es corderez y las güellas yeran algo que baleba diners, pero las pontillas no. El güelo del mozé que yera asentau a la punta la cadiera, mirando-se-lo, le ba dezir:

-Sí, nino, sí, es corderez y las güellas te darán de comé, no pas es trapos y las pontillas.

Las personas grans que yeran en la cozina ban pensá que i hai bezes que ye berdá ixo de que "es críos y es locos dizen la berdá"...

Balbastro, chinere de 2008.